

江都縣志卷之二十三

江都縣知縣五格黃湘重修

人物文學

君子務博學於文學積而發為文章者遂以成經國之大業不朽之盛事不得謂僅雕蟲小技也歷稽邦彥或洽聞彊記幽讚微言或揆藻摘華聲溢金石得志者見用於朝廷不得志亦縱心儒術斐然登作者之堂後先相望蓋彬彬乎美冠東南矣
志文學

漢陳子迴顏方與王充同時充稱之為班固揚雄傅毅
江都縣志 卷之二十三 文學 一

之徒文辭斐炳賦象屈原賈生奏象唐休谷永當今未顯使在百世後則子政子雲之黨也

徐淑字伯進隨父在京師舉茂才寬裕博學習孟氏易春秋公羊傳禮記周官善誦太公六韜交結英雋常有壯志仕至度遼將軍子璆另有傳

三國袁曄字思光廣陵人作獻帝春秋

范曄字孝敬仕吳初為太子登賓客登日之曰究學甄微游夏同科又嘗謂其竭忠知己之君纏綿三益之友慎性純直著論二十篇曰矯非後為侍中出補武昌左都督治軍嚴整孫皓甚憚之詔曰慎勲德俱茂朕所敬

憑宜登上公以副衆望拜太尉慎請老軍士戀之舉營
隕涕

皇象字休明幼工書時有張子竝陳良甫能書良甫適
而子竝峻象斟酌於間甚得其妙一時善書者不能及
也官至侍中青州刺史人謂象章草入神八分隸入妙
篆入能建業有吳時天發讖及吳太帝碑在江甯府皆
象書也

衛旌字子旗避亂江東窮困績學與步騭同年相善俱
以種瓜自給晝勤四體夜誦經傳旌後官至尚書

華融字德蕤祖父避亂居山陰蕊山下時皇象亦寓居
江都縣志 卷之三十三 文學 二
山陰吳郡張温求就象學欲得所舍或告温曰蕊山下
有華德蕤者雖年少有令志可舍也温遂止融家與朝
夕譚講温後爲選部尚書乃擢融太子庶子遂知名顯
達子諱黃門郎諱子譚晉秘書監另有傳

徐彪字仲虞文采斐亶與張温同意數交書疏聞問往
還温引與暨艷同爲選部郎艷性捐厲好爲清議見郎
署混雜多非其人彈射降損守故者十未能一由是憤
怨之聲積浸潤之譖行矣並言彪愛憎不由公理艷罹
於禍彪亦及

晉閔鴻與丹陽薛兼紀瞻吳郡顧榮會稽賀循齊名號

爲五雋初入洛司空張華見而奇之曰此南金也
戴邈字望之淵弟少好學尤精漢史才不逮兄而儒博
過之弱冠舉秀才尋遷太子洗馬出補西陽內史永嘉
中元帝版行邵陵內史丞相軍諮祭酒時凡百草創學
校未立淵上疏言帝王至務莫重於禮學宜漸卽修建
帝納焉尋代劉隗爲丹陽尹王敦作逆加左將軍及敦
得志淵遇害邈坐免官敦誅後拜尚書僕射卒贈衛將
軍諡曰穆

齊高爽善屬文永明中贈衛軍王儉詩爲儉所賞及領
丹陽尹舉爽郡孝廉入梁歷官中軍臨川王叅軍出爲
江都縣志

卷之三十三 文學

三

晉陽令坐事繫治作獲魚賦自况文甚工乃遇赦
唐公孫羅官沛王府叅軍無錫丞曹憲以梁昭明文選
授諸生羅與魏模李善相繼傳授其學大行羅有文選
註文選音義

魏模武后時爲左拾遺模師曹憲傳其文選學

奚陟字殷卿少篤志羣書擢大歷進士第又舉文詞清
麗科授宏文館校書郎仕終吏部侍郎卒贈禮部尚書
世謂陟善於其官智足自處嘗與柳宗元父爲友姓名

見宗元所爲先友記

按唐書列傳陟京兆人舊志謂爲江都不知何據

王紹宗字承烈梁左民尚書銓曾孫少勤學徧覽經史

尤工草隸家貧常傭力寫佛經以自給每月自支錢足
卽止雖高價盈倍亦卽拒之徐敬業起兵揚州聞其高
行遣使徵之紹宗稱疾固辭又令唐之奇親詣所居逼
之竟不起敬業將殺之之奇曰紹宗人望殺之恐傷士
衆心由是獲免事平則天驛召至東都權拜太子文學
累轉秘書少監紹宗性雅澹以儒素見稱當時朝廷之
上咸敬慕之歸卒鄉里

李邕字太河善子也少謁李嶠自言讀書未徧願一見
秘書嶠曰秘閣萬卷豈時日能習耶邕固請乃假直秘
書未幾辭去嶠試問奧篇隱帙了辯如響嶠歎曰子且

江都縣志

卷之二十三 文學

四

名家武后朝嶠爲內史與張廷珪薦邕可任諫諍召拜
左拾遺御史中丞宋璟劾張昌宗等反狀武后不應邕
立階下大言曰璟所陳社稷大計當聽后色解爲可璟
奏中宗時召拜右臺殿中侍御史彈劾任職遷戶部員
外郎明皇卽位爲御史中丞屢左遷開元中起爲括州
刺史復坐誣枉且得罪上識其名詔勿劾後歷淄滑二
州刺史邕蚤有名重義愛士久斥外不與士大夫接及
入朝人傳其眉目瓌異阡陌聚觀後生望風投謁門巷
填溢復以讒媚出爲汲郡北海太守天寶六載宰相李
林甫忌邕名盛因傳以罪遣羅希奭就郡杖殺之代宗

時贈秘書監邕爲文長於碑頌官雖屢黜天下慕其名
盧藏用嘗謂邕如干將莫邪難與爭鋒但虞缺折耳
李該字彥博學無不通尤好地理圖志患其門類繁多
文詞汎濶廼考職方異同該暢簡核成一家言猶懼後
生莫窮其奧又作地誌圖凡禹蹟所至漢譯所通莫不
備載乾象坤勢炳然可觀呂溫藻翰擅一時於流輩少
所推尚從該遊獨久稱其爲節達之士爲序地誌圖云
南唐馮延巳字正中一名延嗣以文雅博瞻稱授秘書
郎歷官至左僕射同平章事延巳工詩雖貴且老不廢
識者謂有元和人氣格卒諡忠肅

江都縣志

卷之二十三 文學

五

潘祐一作佑

氣宇孤峻不營貲產文章瞻逸尤敏於議論

以秘書省正字直崇文館輔後主於東宮後主卽位遷
史館修撰改知制誥祐極論時政無所迴避後主手札
敦喻之祐七表不止因請休官遠去乃徙祐專知國史
悉罷其職時江南衰削祐所上諫疏有陰陰如日將暮
之辭後主惡之又其所薦黜與時輩不協因誣以他事
劾祐祐自刎母及妻子徙饒州

徐延休字德文會稽人風流淹雅唐乾符中進士昭宗
狩石門無學士草詔延休來調官適在旁近逆旅左右
言其工文詞卽召見命視草昭宗善之及還長安不得

用梁蔣元暉辟爲佐延休棄去依鍾傅於洪州吳取江西得延休仕至光祿卿江都少尹卒二子鉉錯遂家廣陵

宋徐鉉字鼎臣十歲能屬文不妄遊處仕南唐李煜爲吏部尚書宋師圍金陵煜遣鉉求緩兵煜以鉉旣行欲止上江援兵勿令東下鉉曰江南所恃者援兵奈何止之煜曰方求和解而復決戰豈利於汝乎鉉曰要以社稷爲計豈顧一介之使置之度外可也煜泣而遣之及至雖不能緩兵而入見辭歸禮遇皆與常時同及隨煜入覲太祖責之聲甚厲鉉對曰臣爲江南大臣國亡罪

江都縣志

卷之二十三 文學

當死不當問其他太祖歎曰忠臣也令爲太子率更令直學士院從征太原軍中書詔填委鉉援筆無滯辭理精當時論能之累遷左常侍卒年七十六鉉精小學好李斯小篆臻其妙隸書亦工有文集二十卷新定說文質疑論稽神論陸游南唐書云鉉後與湯悅同奉勅撰江南錄鉉於李氏亡國之際不言其君之過但以歷數存亡論之君子有取焉

潘聞字逍遙嘗居洛陽賣藥暇日負囊騎驢看山行吟意有所適終日弗返好事者繪爲圖孫僅魏野皆有詩贈之至道初有言其能詩者因召見崇政殿賜進士及第授四門國子博士後坐盧多遜黨變名姓緇服入中

條山嘗題詩鐘樓句奇崛僧疑而迹之逸去朝廷捕治方急闖度不免出首謫信州移太平結廬郡治西南瀕溪居焉吟詠不輟

舊志載有潘及甫按府志選舉考及本傳及甫泰州人故不編入

張象中有學識與子宗彞宗古聯名中第宋宣獻公贈以詩曰棘圍舊價喧龍首花塔新題續鴈行當時榮之仲并字彌性紹興進士歷光祿寺丞終朝請大夫淮東安撫使叅議幼好學強記每一展誦終身不忘其母嘗屏所觀書几上惟臺歷一冊明旦默記纖悉不誤并爲文閱肆不羈而關鍵整密所著有浮山集十六卷

田克悉字安叔學問該博爲鄉里所推嘉定元年登進

江都縣志

卷之二十三 文學

七

士任松溪主簿秩滿試博學宏詞科崔與之帥揚甚敬禮之及鎮蜀辟置幕府資其贊畫後知沔州在任決疑獄抑僥倖節浮費政績茂著民甚愛之

元彭好古字德明泰定二年尹崇安縣每朔望及上下旬暇日輒率邑儒與吏詣學講解經史立惠民局新廣福橋多所建立

明李鴻漸洪武初辟薦時由人材仕者江都計二十餘人惟鴻漸以文學徵累官至刑部尚書當時榮之

邱民字克莊洪武初爲松江府學訓導慕學之士自遠而來數年中無慮千數松江一時文風之盛不下鄒魯

舊志云民洪武九年舉於浙江宋濂鄭戩以知禮薦仕至禮部侍郎

張金字伯堅邑諸生博學能詩家貧有節操不俛仰世態嘗謂其門人某曰貧也奈何某曰聞之天道不絕善人先生幸自寬金笑曰所恃者此耳後竟以貧終老曾預修嘉靖維揚志

李自奇字季常先世自陝西遷江都自奇八九歲能誦史記文選諸書父奇之命治舉子業自奇踰而辭曰帖括而役公車兒不願也遂肆力於古文詞尤工六朝小賦及樂府其書篆籀八分行楷靡不工八分尤入妙

何堅字叔節副使城之弟嘉靖庚子舉於鄉授臨江府

江都縣志

卷之二十三 文學

八

通判攝峽江令縣稱治遷藩府審理請老歸以著書爲事闔戶不交當世嘗著律呂書又有漕渠七議當世多采用之始與兄城師事關中呂柟俱力持師說以破羣議世稱體道信義者必曰何叔節云

葛澗字子東其先鳳陽人父欽徙江都欽嗜古書構樓五楹藏書數千卷至澗益至萬餘卷江淮間稱積書多者無如葛氏澗博學有名理坐臥一樓手一編寒暑不廢嘗撰本朝人物編始洪武迄嘉靖數十百卷人爲列傳甚悉少從湛若水遊德器深粹年七十餘卒

高懋功字世賞少卿澆子登嘉靖戊戌科武進士授錦

衣衛左所鎮撫罷還江都故業解盡無以爲家工爲詩尤喜奕陸弼稱其五七言近體駸駸錢劉佳境下亦不失爲戴叔倫溫飛卿之流卒年九十

周璠字子重以郡諸生補太學性沉鬱刻意爲古文詞嘉靖間授惠安縣主簿旋罷歸初璠與同里史起蟄李應陽葛澗輩竝以博學稱互相切劘璠旣歸諸人雨散獨璠偃蹇故居翛然以著述自喜其書多散逸或爲人乞去惟存邗城子二卷葛澗序之

黃一正字定父博涉羣書爲文雄卓典麗屢試棘圍不遇銳意爲詩賦古文詞蠟屐負筴遍遊海內過名山川

江都縣志

卷之二十三 文學

九

輒有記廷尉陳王叔好古多聞稱爲畏友司寇王世貞秉人倫鑒見一正曰博學宏詞吾目中僅見定父留之弇山園讀書子明昌十歲侍父客分韻賦金山詩有孤島擎飛鷺狂瀾壓伏牛之句長以例貢入太學驚才絕艷所著有五經埤傳事物紺珠等書

陸弼字無從自髫髻至老治博士家言伊吾吟哦日夜不少廢又好博涉多所撰述廣陵爲南北孔道請延賓客結納賢豪長者其聲籍甚嘗爲詩曰匣有魚腸堪借客世無狗監莫論才何元朗激賞之趙貞吉當國議修正史請徵故知縣王一鳴故同知魏學禮太學生王穉

登生員陸弼入史館與纂修未上而罷弼嘗預修郡志
江都志則盡出其手後世咸徵信焉自著有正始堂集
二十餘卷

閻士選字立吾年十二能文章學臣耿定向拔置第一
命隨試十四郡皆冠軍成萬曆庚辰進士仕蘄水令以
不附張居正阨抑十年始擢刑部主事多所平反陞登
萊道備兵鳳門巨寇柳廷瓚倡亂以計平之晉山西右
布政使勞瘁卒官子汝梅另有傳

孫世恩讀書不屑屑於章句之學窮究義理本於致知
宗事王守仁因自號曰養明萬曆中以明經授縣令在
江都縣志

卷之三十三 文學

十

官猶勤講課有彙聞警心錄行於世
白應虛字子直由選貢歷知新樂桂東正陽三縣所在
著善政解組還偃仰一室左圖右書尤工五言古詩直
窺韋柳藩籬陸弼盛稱之

張懋勳字堯光邑諸生性嗜學鍵關兀坐者三十餘年
自謂於理學有得所著有二劍齋日編及心學正統等
書

蘇光達字觀五邑諸生性至孝五歲失母哀毀如成人
鄰母憫其幼市修脯啖之拒不食長嗜學家故貧從知
交借書課讀冬無完衣環走一室跳踊以敵寒終不輟

卷暑夜置足甕中披襟朗誦日出猶篝火熒熒几席間
爲文疏達頗得眉山之致性諧曠獨不善佛氏說謂盡
性立命聖學本明奈何寂滅詭道其持正如此七試棘
圍不遇摧鬱得病死年三十八易簣時尚手持一編就
瞑云

顧大猷字所建夏國公成之裔孫以勲衛帶刀侍從旋
謝病歸讀書修韋布之行折節置驛延請四方賓客聲
稱籍甚嘗遊秦中賦詩弔古留連武功鄠杜間訪問康
王遺伎召至坐中青衫白髮歌殘曲道故事風流慷慨
長安少年至今傳之用御史薦募兵江淮間兵甫出被
江都縣志

卷之二十三 文學

十一

讒謫戍赦還母死身病早夜呼憤邑邑不得志而卒大
猷事母篤孝撰鎮遠先獻記叙述先人勲績甚備搜採
掌故條列時政著書數千卷秘不以示人私謚孝譽先
生

陳以忠字恕先邑諸生性孝友析箸時盡以父產與弟
曰吾有硯田可耕也精於易義常曰六爻之義統於大
象更爲六十四卦大象說黃汝亨見之曰今之虞翻也
爲文宏深典博年六十四卒

倪啟祚字永昌萬曆己未進士改庶吉士授編修同館
姚希孟顧錫疇皆重其文章天啟間逆璫魏忠賢毒虐

善類啟祚方在告愼甚草疏論其奸狀適遘疾不果上旋卒

蔣善字元長崇徵丙子魁於鄉閉戶安貧研求邵雍河洛數所著有史記彙十卷

孫鼎字大宣崇禎丁丑進士授大理評事典試四川所拔皆名雋丁丙艱歸不復仕閉門著述吟觴自終子繼登繼邈皆有文名

王玉藻字質夫吏部納諫子也崇禎癸未進士筮仕得慈谿令慨世運之艱旋歸里閉門謝客陳書綴卷怡志詩酒間自附於南嶽幽棲之士後作絕命詞飄然而逝

江都縣志

卷之二十三 文學

七

世咸稱其別號曰螺山先生子方岐另有傳

王光魯字漢恭邑之瓜洲人潛心績學屏跡城東寺樓去其梯期以三年盡讀古人書閉二載以母病歸侍養光魯學窮根源東南名輩咸推仰之著有閱史約書最為世所珍重

魯東錡拔貢生工詩文書畫著有偶然集

國朝熊敏慧字穎生瓜洲人順治乙酉舉於鄉掩關靜坐潛心性命之學嘗教諸子曰士人讀聖賢書一遇窮阨輒易其守所學何事終日手一編布袍蔬食恬如也工古文詩歌旁及書畫晚年居宜興張渚怡情山水以終

所著有汲冷堂集子維熊另有傳

卞汾陽字雲郭國初制藝尚沿故習競以鞿悅爲工汾陽力振之原本先民卓然有以自樹學使李嵩陽特器重焉丙戌再行鄉試以爭元僅中副車後 廷試京江張文貞時爲侍讀以國士遇之名噪輦下授高淳教諭講學礪行有蘇湖之風

張錫文字康侯少貧好學坐處木榻爲穿順治庚寅以恩貢授滎陽令治行澤以詩書政聲甚著陞邠州守卒於官錫文天性醅摯尤能篤天顯之愛云

王玉輅字僕夫納諫次子八歲能屬文句曲張賓王見而奇之補諸生試輒冠其曹偶於書無所不讀雜誦達旦率以爲常際兵燹踉蹌出避携一童子負竹篋人意必金篋也發視之手抄故經史數十卷而已

郭茂英字青門涇陽人籍江都先是以諸生入棘園主司擬冠經房因策觸時忌不售家貧授徒自給唯日讀書窮古人精蘊立身嶄嶄不苟言笑時人方之郭有道郡守重其賢延正賓筵焉

韓日章字澹仲原籍蒲坂世居江都好修力學補博士弟子讀書不屑章句教子弟以誠敬爲學弟日起子燦皆成進士誠之曰科名重人人重科名此中要有分別

毋徒以鄉之要人致斥於蘇明允譜引也識者規爲名言

史以遇前進士荆南參政起元從子也順治戊子舉於鄉負異才文章瑰麗尤能究心經世之學江都里役繁重累民倡議五戶輪催其法永以爲便又因水災請蠲賑賴以全活者甚衆子奭丁酉舉人亦能紹遇志著述必有關時務有淮揚治水圖說行於世

常典字叙五明開平王遇春後也性聰穎讀書十行俱下中順治辛卯鄉試父三歲而孤祖母蘇守節逮存遂絕意仕進卜居湖干種竹蒔花以養志日淬厲於學儒江都縣志

卷之二十三 文學

十四

修懋焉後授涇縣教諭講課有明先正遺風著有太易手拈尊屏寶詮楷士寶錄諸書

張標字玉立瓜洲人順治壬辰進士授工部主事權南新龍江二關俱有廉能聲晉郎中歸標爲文根柢六經鎔錘諸子沉浸醲郁含英咀華論者謂壬辰榜中標與李來泰戚藩唐德亮相伯仲焉

高凌雲字尺木初家瓜洲後遷入郡少補諸生甚貧假館授徒越日歸省其家必從籬外聽聲息然後入恐妻子之飢且斃也後窮益甚處之泊如益攻苦登順治戊戌進士授嚴州府推官折獄平恕人稱長者旋告歸閉

門讀書樂與後進講舉子業決科驗如筮卜遠近之士咸服之子天驥康熙辛酉舉於鄉官山陰知縣韓日起字碧滄順治戊戌進士初授松江府學教授課士一遵安定先生之法遷河南盧氏知縣勤於撫民雖僱科亦若有不忍者乞休歸屏跡不入公府唯以文學引掖後進士林咸師尊之

宗觀字鶴問明主事名世之孫以江甯籍中副榜爲貴池學官數年復遷常熟皆以師法爲四方所稱道觀性敏好古勤學尤長於詩而襟懷曠朗不問家人生業故其詩蕭疎幽雋近於韋柳新城王士禎甚愛賞之生平江都縣志

卷之二十三 文學

五

篤於朋友以問學相取吟詠之外卽無所與謀年七十餘卒於常熟有詩文集各數十卷藏於家從弟元鼎亦以詩名

陳無競字鴻烈生而木質見人侗然縮胞胸似不敢前性好讀書自經籍而外凡三教九流之書無不手自蒼葢膽寫著述等身爲文奧博沉厚而不得志於有司年三十餘始爲諸生屢躓棘闈有爲扼腕者笑曰吾篤吾學而已吾不遇自有遇之者何憾詩絕似孟襄陽而所遇亦如之里中高其行多率子弟從之遊

馬睿卿字深源明叅政呈秀子也生九歲而孤天資明

敏家貧折節於學博覽無所不窺補邑弟子員倪長珩見其文歎曰子以秦漢爲文長珩外誰復知子者睿卿恬淡寡欲好劇論古今成敗朝廷掌故舉其端必竟其委爲文不囿於流俗卒不得志而歿所著有寤呻錄一卷詩一卷

劉冀鏐字玉介其先河津人補揚州郡博士弟子食餼有聲性端方敦孝友窮年讀書深探先儒性命宗旨集邑士金玉節王玉陞等十一人講習於董子祠大暢正誼明道之旨學者多宗之子訥夢錡能世其學夢錡另有傳

江都縣志

卷之二十三 文學

六

汪懋麟字蛟門康熙丁未進士授秘書院中書舍人每入直必携書卷竟夜展誦弗輟楚人朱二眉號神仙傾動公卿懋麟獨著辨道論力詆其妄值憂歸薦舉博學鴻詞不赴服闋以主事銜入史館與修明史越三年補刑部主事能辨疑獄尋罷歸杜門絕俗晝治經夜治史以鄭樵通志浩繁手爲減削細書之其爲文法歐曾詩合杜韓蘇陸爲一家所著有百尺梧桐閣集二十三卷兄耀麟字叔定並負時望所著有抱耒堂諸集耀麟子荃郡廩生亦以詩文名

徐石麟以明經知名閉戶著述有趨庭述訓枕函待問

北醒語天人升降圖說等書皆有會於儒先宗旨

吳綺字菌次五歲能詩長益淹貫尤工駢體順治中拔貢生授中書舍人奉 詔譜湯繼盛樂府歷工部郎中

出知湖州府濬碧浪湖構岨山諸亭暇卽與賓客遊觀賦詩郡人凌義渠前明忠臣綺爲構地塋之未幾罷歸貧無田宅購廢圃以居有求詩文者輒以花木爲潤筆因名其圃曰種字林又與文人名士爲春江花月社所著有林蕙堂集記紅集宋金元詩永等書綺壻江閩字辰六康熙癸卯中貴州鄉試亦工詩古文

高以位字素其孝健子康熙庚戌進士授中書科舍人

江都縣志

卷之二十三

文學

十七

生平著述甚富後學奉爲楷模以文藝闡易理獨能得其精諦恬於仕進居鄉介然有守守令重其賢每修式廬之敬家教尤嚴肅子克譽承其風矩亦以文行有聞程思曠字謀伯食餼於徽後徙江都事親以孝聞讀書能究性理粹義講學淮揚間畏糧來聽者踵接更喜道古今節烈事所著有詠史諸什及鈍人集二卷

熊維熊字偉男敏慧子康熙壬戌歲貢博聞彊記爲文能撫華尋根嘗於一歲中七試居第一人王士禎司理揚州特置國士之目工詩古文詞畫亦得董巨遺意好表揚節烈著有瓜渚貞烈志不媿史筆生平篤於孝友

規言矩行鄉里奉爲有道君子舉賓筵辭不赴子壽試
邑文學能紹父風以瓜洲將有江徙之虞卜阡改葬其
先世並昇通族之柩祔焉人咸稱其仁孝

朱璣字宮載邑諸生天性醅謹潛心理學著有火易捷
解嶽起堂文集子潘康熙庚辰進士

吳蓮字余嘉幼孤奉孀母苦志力學補諸生食餼以文
章知名四方負笈從遊者甚衆垂老膺歲薦惟以著書
教子孫爲事有愛日堂文集玉井詩詞若干卷子高佐
志祖俱歲貢生志祖另有傳

桑豸字楚執早歲能文兼工書畫篆籀旣餼於庠力學
篤行推重鄉里丙寅膺歲薦著有編年詩存四十卷文
集二十卷廣陵紀事四卷

江都縣志

卷之二十三 文學

六

許承家字師六承宣弟幼與兄刻苦力學同負盛名康
熙乙丑成進士改庶吉士授編修年六十餘掌院知其
宿學遇有大著作多屬之辛未充會試同考官將循資
遷坊局念兄方里居亦請假歸追隨如少壯時及兄歿
思念流涕不置振乏周急於友誼尤篤與人交推心置
腹藹然可親所著有獵微閣集子昌齡官刑部主事孫
迎年康熙庚辰進士官中書科舍人道章辛卯經魁遡
中癸巳解元迎年子佩璜官開封府上河同知以博學

鴻詞舉信瑞乾隆戊午副榜

王司龍字書常力學修行素重鄉里登壬子賢書文名尤著署華亭教諭善循循誘士爲所造就者多取高第位通顯內而淬厲其子履仁己丑進士爵壬午舉於鄉史申義字蕉飲初名伸康熙戊辰進士改庶吉士授編修歷禮科掌印給事中以疾告歸申義幼穎悟於書無所不覽爲文宏深矯健不肯一字因人尤工詩初倣西崑體旣悔其少作殫力研索歛才歸法風格益上

聖祖嘗遣中使至直廬問翰林中能詩者誰爲最大學士陳

廷敬首以申義對焉同懷兄慶義字蔚奇康熙丙戌進

江都縣志

卷之二十三 文學

十九

士吏部員外郎

程文正字笏山之馥子少工詩古文詞善書法尤精制藝應舉之文康熙辛未成進士筮仕工部都水主事巡視街道洗手供職不名一錢以疾歸閉門却掃唯耽著述不問戶外事也卒年僅四十有四當世惜之有水部遺詩一卷子夢星康熙壬辰進士翰林編修

顧圖河字書宣邑之大橋人父九錫有文名多著述圖河淹洽經史工古文辭書法得虞褚風格方爲諸生名已噪康熙甲戌登一甲第二名進士時

聖祖覽對策至治河一條曰熟悉形勢必生長江淮留心時

務者自是深被知遇授翰林院編修充日講官直南書房與修一統志皇輿表考核精詳同館推爲鉅手出視湖廣學政抵任三月卒於官所著有雄雉齋集

吳德修字元讓幼卽嗜學年十五補邑博士弟子潛心味道能研窮義理之精蘊制藝則會通諸先正大家別裁僞體懿乎其純主坵壇者踰四十年晚乃舉康熙癸酉第二人再上春官不見收人謂其爲老宿如歸熙甫而終不得成進士則遇較熙甫尤阨也生平規言矩行嚴一介於取予學者咸望而師尊之

魏嘉琬字篁中都之子也內行克修資稟尤不世出書

江都縣志

卷之二十三 文學

三

一手觸卽富於胸於文章諸體無不兼擅其長制藝善抉摘幽微直造精奧宗伯許汝霖視學江南拔冠儀邑見其方落落年少驚歎曰其才其年均不可及也康熙丙子舉於鄉名輩皆以大魁期待之兩試禮部不售卒年僅三十有三宜興儲欣德州孫勳爲序其文稿行世義門何焯讀之謂必傳於後無疑也有咀蔗居詩八卷何焯爲之序比之於唐李賀云

吳蔚起字豹文本歙人隨父從殷居江都早年好學屏跡郊外僧舍刻苦文藝康熙丙子舉於鄉上公車不第自悔曰吾學未充也聞宜興儲欣名負笈往從之欣令

盡棄其向所學專攻左史及唐宋古文三年業大進癸未成進士授戶部主事歷員外郎郎中皆以恪勤供職擢御史巡視南城有油賈與民構訟持數千金求直蔚起嚴拒不受卒置之法歷掌京畿道事以終養乞歸閉門却掃有造謁者咸辭不見子安國康熙辛卯舉人楊潛字滙南幼嗜學善詩古文備四體書法以獻賦取入纂修館康熙辛卯舉順天鄉試壬辰

賜進士

改庶吉士授翰林院檢討潛博聞彊記一寓目終身

不忘家貧母老每得俸先封寄以養其母以疾卒於官郭元釭字于宮士璟子生數歲卽善屬對及長工詩文

江都縣志

卷之二十三 文學

三

聖祖南巡元釭以諸生兩次獻詩皆蒙 嘉獎取入纂修館

與修佩文韻府又奏請選刻全金詩輯元好問中州集并上之授中書科中書舍人徙直禁苑編金元樂府壬寅夏橐筆熱河初冬病還逾月卒有一鶴菴集牛鳴雙村集

陳霆發字鳴夏松江人爲江都諸生學博而才高其唾咳皆去俗萬里制藝類徐思曠古文則直與李翱相揖讓也學使試非第一人卽擯不錄蓋能精鑒者恒寡困舉場終不偶俞長城最服膺之聞其亡歎曰讀書種子絕矣

劉祈穀字淑載其先陝之蘭州人徙家於揚代以儒顯多有致科第者祈穀幼負神童之譽年十五卽受知學使張能麟攻苦力學舉場屢得而屢失之其數奇也至老窮經不倦於五經皆有箋註手自編摹期以津逮後學有周易本易補鑿行於世子復文名甚著亦以不偶而卒士林惜之

郭嗣齡字引年光子繼光兄奎後奉母以孝聞家貧授徒以修脯爲其兄嫂營喪葬生平講程朱正學所著神化性命通一無二論士林傳之其傳記序說皆具古法康熙乙未成進士授松江府教授潔已課士爲一時廣江都縣志

卷之二十三 文學

三

文之最雍正癸卯浙江同考官以病歸卒學者稱爲述堂先生其諸兄及子弟皆負時名揚之故家以儒顯者郭氏爲最

陳新楷字依宣父著歲貢生以文行稱借髫年應試屢冠其曹試藝流傳四方奉爲矩式制行無緣飾孝友純篤其天性也構屋授徒從遊者甚盛年逾七十膺歲貢子夢文雍正癸卯舉於鄉

蔣繼軾字蜀瞻少卽文名噪一時試必先其儕偶康熙戊子舉於鄉癸巳成進士巍然老宿矣官編修閉門却掃清望甚著屢充纂修官丁酉分校北闈得士最盛以

憂歸卽淡然仕進唯淬厲其子弟於學門內弋科第者
七人喜汲引後進尤務利濟民物遇災祲及有關地方
利病者直道正辭不恤也性方介不翁翁因人守令重
之制府嘗致禮問於其家子之莢庚子舉人奉節知縣
之蘭丁未進士高密縣知縣

景考祥字履齋江都人幼隨父宦河南遂占籍焉中戊
子經元癸巳成進士入翰林歷監察御史吏科給事中
巡察臺灣遷福建轉運使風采甚著尤素以文章名館
閣主湖廣鄉試前後分校順天鄉闈禮闈凡四秉文衡
所得士皆一時之選性孝友返里門日所以周贍弟兄

江都縣志

卷之二十三 文學

三

宗族者備至以赴補卒於京世咸惜未竟其用云

魏永吉字羽文家貧嗜學不屑屑於舉子業年十四補
博士弟子未幾卽棄去日於書肆搜括古人遺籍得其
斷簡殘編亦不忍捨無錢則解衣質以歸積之成全書
者充棟其搜擇經史諸子說部手錄者凡十尺有奇四
方徵文獻者咸取資焉所著有留補集經解十二卷白
鶴山房詩古文鈔二十卷

楊中選字青臣先世由陝遷江都中選遜志於學矻矻
窮年自有明以來數百年制藝無不能口誦而心維之
終阨於遇生平以篤行推鄉里晚益精究程朱之書粹

然儒者也子汝謨食餼有聲汝典拔貢生授青陽教諭唐繼祖字序皇詩之子博洽古人之書工詩古文詞早致遠名每棘關報罷則士林惜之年五十乃成進士入翰林改禮部郎歷監察御史工科掌印給事中晉通政司參議改鴻臚卿巡視南漕又巡察湖南北遷河南按察使調任湖北所至皆有治績再調江西以病未赴繼祖雖晚達而功名特盛其卒也家無餘財人尤歎焉

魏周琬字旭棠興化人以母氏周姓籍江都吉水李宗伯振裕首拔之琬天資高邁少病屏跡尊經閣三年盡讀閣中書制藝及詩古文詞皆迥絕流俗識者謂今之江都縣志

卷之二十三 文學

三

董賈也逾五十始成進士授善化令一歲卽歸唯日窮究經史生平著述甚富書法亦逼歐柳所刻有論易論春秋論史及文稿充射堂詩稿蓋祇吉光片羽云吳志祖字立先爲名諸生敦行執義弟歿撫其孤有成故人子爲里豪所凌暴毅然以身掖之白於官得伸雪焉十赴棘圍危得而復失者再遊其門者多獲雋志祖晚廼以序貢授宿松司訓恥於罄折遽引疾歸所著有尚書纂要子四顛孫登賢書餘亦有聲

蔣菁字勁草博學工詩文一時稱爲老宿著述甚富有廣陵舊事詩尤足脩文獻之徵弔古者多流頌其美

黃涓字伊人邑諸生工制藝通貫經史及唐宋諸大家之文學使者每拔冠其庠更延致幕中叅校閱家貧歲得館穀供母更以資昆弟子姪衣食之乏性喜闡揚幽潛訪里中節義者撰傳志以表暴之母亡以哀致疾數月而卒人嗟惜焉

喬松字鶴羣儀徵籍世爲江都人工制藝負時名四方稱揚士之魁傑者必曰魏喬魏謂孝廉嘉琬喬卽松也屢爲學使者延操衡鑒僅一中順天副車而歿人惋惜之子大經任平涼知縣松兄起宗亦文名甚著

潘之奭字樹思江都人占籍儀徵家貧績學讀書必窮江都縣志 卷之二十三 文學 三五 古人之精奧發爲文章思深而力健精鑑者謂在正希大力間性純孝事孀母愉愉色養生平未嘗一汨於利勢鄉先達皆敬憚之試海陵疾作學使鄧鍾岳聞其亡嗟歎曰東南失一佳士矣特致唁弔其生徒行哭失聲者數十人喪歸於揚士林爲流涕焉著有語錄一卷四書講義尚書講義藏於家

葛崙字星濤七歲失怙事孀母極孝以治經有聲性侃直無所依回尤負時望生平好劇論忠孝義烈事遇漏佚者表著必力行若不羈而中則介然也著有四書指行於世憲使及守令重其人嘗造訪焉

尤璋字仲玉宋文簡表之後也幼失母事父至孝侍疾目不交睫者屢月及卒毀幾滅性析業時悉以祖產讓弟昆其貧困者仍迎歸養之篤于友朋死生之義恒經紀其家而培掖其後生平行修學邃以老宿著聲學使屢延操衡鑒嘗與修江都縣志揚州府志又聘修徐州府志山東通志雍正間舉博學鴻詞以老辭不就繼又舉孝廉方正人謂其文行均不愧辟薦云子訓世其學文譽籍甚

王文範字竹村廩貢生行修而學邃工文章棘闈屢薦不售士林惜之晚而肆力於詩雄渾蒼勁頗得少陵風江都縣志

卷之二十三 文學

三

味騷壇稱老宿焉

金殿詔字蓮西祖父皆以儒行祀鄉賢殿詔承家學姿尤敏異博涉經史精於莊列下筆立可千言應童子試縣府皆第一遊庠序文名甚籍乙酉舉於鄉董吏部巡學江右重其名延操衡鑒以勞瘁致疾卒士大夫咸悼惜之

黃暹字曉齋嘗割股以療母疾下帷績學所著有四書詩經說約春秋宗旨諸編於鹽筴本末尤精貫巡鹺御史郝浴延修淮政初集轉運使龔其裕又延修鹽法志其書世皆善之生平每好行其義渡江次青山見覆舟

出重金救之獲生者十七人子亘亦遊序有聲

陳倓字定先世居江都貫儀徵籍元總管允忠後也少
卽有聲庠序間康熙庚子舉於鄉署睢甯教諭益自奮
發雍正癸丑以第一人冠南宮對策卽狀頭授翰林修
撰與纂修乙卯分校戊午主順天武闈鄉試充冊封安
南副使科名仕宦爲一時所艷稱年未五十而卒人皆
太息焉

余元甲字葭白遂甯張冢宰所得士也讀書好探曠索
異雅愛交遊四方之賓客資爲外府遇人危難恒不惜
出千金救之家本素封久之遂自卽於貧恥以窮困干
江都縣志

卷之二十三文學

三

故人唯肆力於詩發纖濃于簡古寄至味于澹泊益都
趙宮贊執信以宗工自詡睥睨一世獨謂元甲爲風雅
種子會

天子徵鴻博之士有司上其名辭不就朝貴有欲表薦之者
亦以書辭畏榮懷古貧日益甚年踰六十竟以憔悴死
世咸惜之所著有濡雪堂集少嘗合選韓白蘇陸四家
詩新城王司寇士禎爲之序序見帶經堂集中所謂余
生栢巖者元甲舊字也